



Consei General: aproà l bilanz de previjion per l'an 2016 e per i trei egn 2016-2018

Con l'astenjion de la mendranza e pèrt del grop misto, l'é stat resservà 11.761.267 euro per ativitèdes, gestion e projec per l'an 2016.

Con 19 stimes a favor e 8 no dates jù, donca duc i conseieres Ual, Maurizio Deville e Tomas Amplatz del grop misto (3 conseieres mencià), ai 22 de mèrz l'é stat aproà dal Consei general l **bilanz de previjion del Comun general** de Fascia de **11.761.267 euro** (de valivament) per l'an 2016 e de 9.577.026 euro e 9.390.597 per i egn 2017 e 2018. Dò l menut de acort a recort de la vitimes di atentac teroristics, domanà dal president del Consei Consei **Francesco Pitscheider** e da la procuradora **Elena Testor**, la conseiera de Procura competente **Lara Battisti** l'à despiegà la desferentes pèrts de n bilanz (mender che chel del 2015 che l'era de 14.303.035 euro), che la l'à defenì: «Mesurà e tecnic, aldò de la ressorses economiches a la leta, e enijnà con la neves indicazions en doura aldò del sistem del "doppio binario" (finalitèdes e projec)».

Cinch i setores del rendicont: "aministrazion generèla" 2.557.106, che tol ite estra che 942.000 euro di trasferimenc provinzièl per la speises ordenères ence 1 milion de euro dai comuns per l "Fon strategich teritorièl"; "istruzion e cultura" 1.095.790 euro, che tol ite 373.700 euro provinzièl per l stravardament de la mendranza ladina e 150 mile euro per l derit al studie e ence 293.150 euro per fèr fora e recuperèr la Ciasa de la Moniaria; "turism e sport" 35 mile euro; "teritorie e defendura de l'ambient" 3.575.788 euro, con presciapech 454.121 euro dac fora anter Provincia de Trent, l Consorzie Èghes da Mont e comuns per la "Rei de la resserves" e 182.468 euro per i lurieres de modernisazion del zenter de compatazion de Ciarlonch; "setor sozio-assitenzièl" 2.106.584 euro, con 1.746.209 euro provinzièl e chi che resta da pèrt de comuns, enc, privac e utenc.

Nicola Zanoner (Ual), a la fin de la prejentazion de Lara Battisti, l'à domanà de poder aer mingol de più temp a la leta per vardèr fora l bilanz respet ai tempes pervedui, e l'à volù schiariment sul stat d'atuazion e l'arvanz del 2015. Recordan la desponibilità del personal del Comun general a meter a la leta i documenc, Battisti en cont de l'arvanz del 2015 l'à dit avisa: «No aon amò indicazions segures, l podessa esser blocà per dut l'an 2016».

Thomas Amplatz, enveze, do aer abù spiegazions dal Conseier de Procura **Gianlugi De Sirena** en cont de la quotes provinzièles da 300 mile euro per trei egn per la Ciasa de la Moniara l'à portà dant na valutazion de duc i finanziamenc di val, a vida che l Comun general posse fèr cernies strategiches per l teritorie: «Te chisc egn – l'à dit - la aministrazions à abù taes, smaoré da la perequazion anter comuns, aldò de l'Imis e spostà ressorses te fons, ma fossa enteressant cantifichèr l smendrament de la desponibilità economica». La proponeta la é stata touta sù ben da desvalives conseieres e da la procuradora che l'à dit che la se metarà a la leta per troèr na vida per stimèr la zifra. «La perequazion merita dassen na fona reflescion – l'à dit l conseier provinzièl **Giuseppe Detomas** – percheche la dejutola per i comuns turistics». La manovres perequatives metudes en esser da pech, l'à donca sottrissà l conseier de Procura **Celestino Lasagna** les é dò che les smendra i trasferimenc ence a la noscia Apt: «Verdaron se la stéora de sojornanza darà dassen chi scioldi che ge vel per projec e promozion per la val».

Te fasa de litazion, **Cesare Bernard** l'à palesà l voler de la mendranza de no dèr jù la stima en cont del bilanz percheche no l'é inovatif e no l'à na vijion per n davegnir de val, metan en esser n confront con l conseier de Procura Riccardo Franceschetti che tinùltima l'à dit: «Chest l'é l'endrez de set comuns, e vo no l litède percheche non siede te la maoranza». **Giorgio Mazzel** (Ual) ge à responet, enveze, che binàn ensema la ressorses economiches se aesse podù tegnir su la operes soracomunèles.

Tinùltima per l'interogazion portèda dant dal grop misto en cont de l "Fon strategich teritorièl" del Comun general de Fascia, **Maurizio Deville** l'à domanà de cognoscer la somes depojitèdes da ogne comun, la cantità de ressorses provinzièles per l fon, la strategia del Comun General e l'endrez a una coi comuns e ence la modalitèdes e i tempes de doura de chisc fons. «Demò Moena con più che 800 mile euro e Ciampedel con 80 mile euro à depojità versamenc. Cò se sà la zifra de la ressorses metudes a la leta da la Provincia, vegnarà stabili la finalitèdes e i criteries del fon», ge à responet(per scrit) la procuradora.